



PRESS SECRETARIAT

MINISTRY OF THE PRIME MINISTER & CABINET

Apia, Samoa

Telephone : (685) 63222 ext 746, 747, 748, (685) 24799, (685) 26397

Fax : (685) 26322 Email: pressesecretariat@samoa.ws

Press Release

30 Iulai 2008

1. Tofia Pule Sili Matagaluega Fuainumera Faamauina.

Ua faamaonia e le Kapeneta le toe faaogaina o le tulaga tofi o le Government Statistician ma faaululuga o le Matagaluega o Fuainumera Faamauina, faapea ai ma le tofia o le Susuga ia Muagututia Sefuiva Reupena e avea ma Pule Sili o le Matagaluega.

E pei ona silafia, sa tuufaatasia le Matagaluega o Tupe ma Fuainumera i lalo o le faamalu a le Matagaluega o Tupe, ma sa suia ai le faaigoaina o le Government Statistician i le Deputy Financial Secretary for Statistical Services, ma o lea tofiga sa tauaveina e le Susuga ia Muagututia Sefuiva Reupena.

Na amata aloaia le toe fa'atuto'atasi'ina o le Matagaluega o Fuainumera Faamauina i le Aso 1 Iulai 2008 e pei ona faamaonia i le faaiuga FK (07) 17 a le Kapeneta. I lalo o lea faaiuga, sa faamaonia ai foi le siitia o le tofogi o le Government Statistician ina ia tutusa ai ma tofogi o Pule Sili a isi Matagaluega.

O le Susuga ia Muagututia Sefuiva Reupena sa avea ma Sui Pule Sili a'o i lalo o le pulega a le Matagaluega o Tupe, a'o lea ua avea nei ma Pule Sili o le Matagaluega o Fuainumera Faamauina.

2. Fesoasoani Tupe mo le Au Filifilia a Samoa mo le Olimipeka.

Ua faamaonia e le Kapeneta le tuuina atu o le vaegatupe e \$50, 000.00 i le Faalapotopotoga o Taaloga a Samoa e fesoasoani ai i le malaga atu o le au a Samoa mo Taaloga a le Olimipeka e faia i Beijing mai le Aso 8 – 23 Aokuso 2008.

O le au a Samoa ua na o Sui mai taaloga na mafai ona ausia le tulaga maualuga e moomia mo ia taaloga, e pei o le Si'isi'i U'amea Mamafa, Afeleti, Fusuaga, Fanafana ū ma le Alogava'a.

E to'afitu (7) le aofa'i o le au taaalo a Samoa o loo faamoemoe e malaga mo Beijing, faatasi ai ma le au Ofisa e to'aiva (9). O le a auai atu foi se alii ma se tamaiatai i le vaega o tupulaga talavou e fai ma Sui o Samoa i le togalauapi mo tupulaga, e amatalia ao lei tatalaina aloaia Taaloga o le Olimipeka.

3. Tofia o le Amepasa o Samoa i Peleseuma.

Ua faamaonia e le Kapeneta le toe tofia o le Afioga ia Tuala Farani Chan Tung i le tofiga o le Amepasa o Samoa i Peleseuma ma isi atunuu i Europa mo le isi tolu tausaga e afua atu ia Oketopa 2008.

O le Afioga ia Tuala Falani Chan Tung na uluai tofia i lenei tofiga i le tausaga 2005. A'o le'i tofia Tuala e fai ma Amepasa o Samoa i Peleseuma, sa avea o ia ma faufautua i le Matagaluega o le Vaifafo ma Fefaatauaiga. Sa avea foi o ia ma Pule Sili o le Matagaluega o Pisinisi, Fefaatauaiga ma Alamanuia.

4. Malaga le Sui Palemia i Fiti.

Ua faamaonia e le Kapeneta le auai atu o le Sui Palemia, le Afioga Misa Telefoni, i le Fono Faaletausaga a le Aufaisea a le Pacific Forum Line (PFL), e usuia i Fiti i le Aso 5 Aokuso 2008. O le a auai atu foi le Afioga i le Sui Palemia i Faatalatalanoaga o le Faigapaaga a le Malo ma le PFL i le Faatauina o le Vaa o le MV Forum Samoa II e faia foi i Fiti i le Aso 4 Aokuso 2008.

O le fono faaletausaga a le PFL e faia i tausaga uma, ma e tatau lava ona auai ni Sui o Samoa ina ia faaalua ma faamautu ai ni mataupu taua aua se lelei o felauaiga i totonu o le Pasefika. O lenei fono o le a tuuina mai ai se lipoti a le Konesale Tutoatasi, lea sa tofia e le Aufaisea i le fono sa faia i Fiti i le masina o Mati o le tausaga nei. O lea lipoti o le a tuuina mai ai ni faamaumauga i se iloiloga auiliili o le PFL ma le tulaga o loo i ai le faatinoga o ana galuega i le taimi nei faapea ma le lumanai, e pei ona tuuina atu i lalo:

- i. Suesuega o le Pulega ma metotia mo le siitia o lana auaunaga faapisinisi i le lumanai;
- ii. Suesuega o le aofaiga o Sui o Komiti Faatonu ma le faatulagaiga o le Komiti Faatonu.

A'o le'i faia lea fono, ua i ai se faamoemoe e auai atu le Afioga i le Sui Palemia i faatalatalanoaga o le faiga faapaaga a le Malo ma le PFL i le faatauina o le MV Forum Samoa II e pei ona faamaonia e le Kapeneta. O le faamoemoe o lea faatalatalanoaga o le a faamautu ai se ata faataatia ma le igoa o le kamupani, le aofaiga o le tupe faavae, le Komiti Faatonu, o le faatulagaina o galuega faapea ma isi mataupu ina ia faatino ai loa le faatuina o le kamupani fou e faafoea le MV Forum Samoa II.

O le a malaga faatasi le Afioga i le Sui Palemia, ma le Pule Sili o le Kamupani Vaa a Samoa (SSS), faapea ma le Sui o le Komiti Fauafautua mo le Fetuunaiga o le SSS.

5. Umusaina o Auala i Savaii.

Ua faamaonia e le Kapeneta le polokalame mo le tatalaina aloaia o ni auala se lua i Sataua ma Vaiafai i Savaii i le Aso Tofi, 7 Aokuso 2008. Ua maea foi galuega mo le auala i Fogasavaii, a o lea ua faataatia le umusaina o lea auala mo se isi aso o i luma.

O le auala i Sataua sa fausia e le Kamupani o le Sakalafai General Contractors Ltd. O le auala i Vaiafai sa fausia e le Kamupani o le Apia Lua Ltd, ma o le auala i Fogasavaii, sa fausia e le Kamupani o le SWELL Savaii Operation Ltd.

O le auala i Sataua o le a umusaina i le itula e 12:30 pm, ma o le o le auala i Vaiafai o le a umusaina i le itula e 2:30pm i lea lava aso. O le saunoaga auatu mo le umusaina o ia auala e lua o le a fofogaina e le Afioga i le Palemia, le Susuga Tuilapea Sailele Malielegaoi.

6. Vaegatupe mo le Fale Faamasino Fou i Tuasivi.

Ua faamaonia e le Kapeneta le tuuina atu o le vaegatupe e \$7,500.00 aua tapenaga mo le tatalaina aloaia o le Fale Faamasino Fou mo le Matagaluega o Faamasinoga ma le Faafoeina o Tulaga tau Faamasinoga i Tuasivi, i le aso Tofi, 7 Aokuso 2008.

O le lagolago a le malo i nei galuega a le Matagaluega, ua mafai ai ona ausia se isi laasaga fou mo le Ofisa i Tuasivi. Ua siitia foi le tulaga o le nofoaga o loo galulue ai le aufaigaluega mo le tautuaina o le mamalu o le atunuu o loo alala i Savaii.

I le tatalaina o lea Fale Faamasino Fou, o loo faamoemoe e malaga atu le Matagaluega o Faamasinoga o loo i Apia ma Mulinuu mo lea aso faapitoa. O lea galuega o loo galulue ai le Kamupani o le ALCC Brown.

7. Fono i Ausetalia.

Ua faamaonia e le Kapeneta le auai atu o le Afioga i le Sui Palemia, Afioga Misa Telefoni i le Fono a le Pulega o Tagata Tafafao Maimoa mai Fafu ma le Pulega a le PolyBlue, ma le Fono a le Komiti o loo iloiloaina le Maketiina o Samoa i Fafu, o le a usuia i Ausetalia mai le Aso 5 – 12 Aokuso 2008.

O le faamoemoe o lenei faigamalaga o le faalauiloaina atili lea o Samoa i lea maketi, ma o le a faia ai foi fono masani ma le Kamupani Vaalele a le Atunuu faapea ma kamupani o loo faalauiloaina ma faatauina faigamalaga mai i Samoa. O le a avea foi lenei avanoa e faatalanoa ai auala mo faafesootaiga aua le faatinoga e Samoa o polokalame faalauiloa e ala lea i le televise, leitio, nusipepa ma le initeneti.

O le a malaga muamua le Afioga i le Sui Palemia i Fiti mo le Fono taua a le PFL, ona toe malaga atu lea i Ausetalia mo lea faamoemoe.

O le faigamalaga i Ausetalia, o le a mlaga faatasi ai le Afioga i le Sui Palemia, o ia foi o le Minisita o Tagata Tafafao Maimoa Mai Fafu, ma le Pule Sili o le Matagaluega o Tagata Tafafao Maimoa Mai Fafu, le Pule o Vaega Tupe, le Pule o le Vaega o le Maketi, Sui o le Ofisa o Turisi i Niu Sila, Sui o le Komiti Faatonu, faatasi ai ma Sui o le Komiti mo le Maketiina o Samoa i Fafu.

8. Talimalo Samoa i ni Fono Faavaomalo.

Ua faamaonia e le Kapeneta le talimalo o Samoa i ni fono faavaomalo se fa (4). O le fono muamua ua taua o le Fono Faaitulagi a atunuu i Sasa'e mo le Talanoaina o ni Fausaga Eeseese e Pulea Tatau ai I'a Feausi Mamao i Ogasami Tutotonu ma Sisisfo o le Vasa Pasefika, o le a faia mai le aso 21 – 24 Iulai 2008.

O le fono lona lua o le Fono Lona Tolu a Faauluuluga o Matagaluega o Faatoaga ma Folesi o le Pasfika, o le a faia mai le aso 3 – 5 Setema 2008, faapea ma le Koneferenisi a Minisita o Faatoaga ma Folesi e faia i le Aso 8 -9 Setema 2008.

O le fono mulimuli o le Fono Lona Sefulu ma le Tolu a le Asosi Foma'i Manu o le Taupulega mo le Pasefika, e usua mai le Aso 17 – 21 Novema 2008.

Government Press Secretariat

0

